

Headlines

1. जम्मू-कश्मीर सरकार ने अंतोदया योजना दे परौआरें लेई रसोई गैस आहले 6 मुफ्त गैस सिलेंडर मंजूर कीते न, बरोधी धड़े बीजेपी ने आखेआ ऐ जे सत्ताधारी पार्टी ने 12 सिलेंडर देने दा वायदा कीता हा।
2. जम्मू-कश्मीर विधानसभा ने 2019 शा पैहले भर्ती अध्यापकें गी टीचरें दी योग्यता परखने आहला टेस्ट देने थमां छूट दी मंग आहला प्रस्ताऽ पास करी दित्ता ऐ।
3. मुख्मन्त्री उमर अबदुल्ला होरें ग्रेटर नोएडा च बस च अगग लगगने दी घटना च कीमती मनुक्खी जिंदगिएं दे नुकसान पर दुख ते बसोस बुज्जेआ ऐ।
4. जम्मू-कश्मीर सरकार ने अज्ज विधानसभा च जानकारी दित्ती ऐ जे प्रदेश च 12 लक्ख 89 ज्हार शा मते करसानें गी फसल बीमा दे दायरे हेठ आहन्नेआ जाई चुके दा ऐ।
5. सरकारै आखेआ ऐ जे जम्मू-कश्मीर च 5 लक्ख 73 ज्हार शा मते एस.टी-2 सर्टिफिकेट्स जारी करी दित्ते गेदे ना।

<><><><><><>

Free Gas Cylinders

खुराक, नागरिक आपूर्ति ते उपभोक्ता मामलें सरबन्धी मैह्कमे दे मंत्री सतीश शर्मा होरें अज्ज विधानसभा गी एहू जानकारी दित्ती जे सरकारै जम्मू-कश्मीर च अन्तोदया अन्न योजना दे परौआरें लेई रसोई गैस दे 6 मुफ्त सलैंडर जारी करने दी मंजूरी देई दित्ती ऐ। इस ऐलान दे बाद सदन च डंड-रौली मची गई ते बरोधी धड़े बीजेपी दे सदस्यें सरकार उप्पर आरोप लाया जे ओहू 12 सलैंडर देने दे अपने वायदे थमां पिच्छे हटा करदी ऐ। मंत्री सतीश शर्मा होरें आखेआ जे सरकारै 6 मुफ्त सलैंडर देने दी योजना गी मंजूरी देई दित्ती ऐ ते इस बारै च होर ब्यौरे तौले गै सांझे कीते जाडन। सत्त पक्ख दे सदस्यें इस घोशणा दा जोरें-शोरें सुआगत कीता जिसलै के बरोधी धड़े बीजेपी दे सदस्यें सरकार दे खलाफ नारेबाजी शुरू करी दित्ती जेह्दे चलदे असैम्बली च शोर-शराबे ते हंगामे आहले हालात बनी गे।

TET-Resolution

जम्मू-कश्मीर विधानसभा ने 31 अक्टूबर 2019 थमां पैहले नियुक्त कीते गेदे अध्यापकें गी, टीचरें दी योग्यता आहले टेस्ट - टी.ई.टी. देने थमां छूट दी मंग आहले प्रस्ताऽ गी अज्ज मुंह-ज़बानी पाए गेदे वोटें कन्नै पास करी दित्ता ऐ। शिक्षा मंत्री स्कीना इत्तू हुं'दे आसेआ एहू प्रस्ताऽ सदन च पेश कीता गेआ हा। इस मामले दे बक्ख-बक्ख पैहलुएं पर चर्चा ते 31 अक्टूबर 2019 थमां पैहले भर्त्थी अध्यापकें दिएं चैंताएं गी उजागर करदे होई द'उं दिनें दी बैहस दे मगरा इस प्रस्ताऽ गी पास कीता गेआ ऐ। इस प्रस्ताऽ तैह्त केन्द्र सरकार गी एहू गुजारश कीती गेई ऐ जे ओहू लोड़चदी कनूनी गैहीं पुट्टने दे कन्नो-कन्नो अध्यापकें दी शिक्षा सरबन्धी राश्ट्री परिशद - एन.सी.टी.ई दे राहें इस सरबन्धै च अधिसूचना बी जारी करना।

<><><><><><>

CM-Noida Bus Accident

मुख्यमंत्री उमर अब्दुल्ला होरें ग्रेटर नोएडा च बस च अगग लग्गने दी मंदे भागें आहली घटना च कीमती मनुक्खी ज़िदगिएं दे नुक्सान उप्पर दुक्ख ते बसोस जताया ऐ। उमर होरें इस हादसे च अपने साक-सरबन्धिएं गी मुहाने आहले परोआरें प्रति हमदर्दी जतांदे होई दुक्खै दी इस घड़ी च उं'दे कन्नै अपनियां संवेदनां बी जताइयां ना। उं'नें हादसे च जख्मीं होए दे लोकें दे तौले नरोए होने दी कीमना बी कीती ऐ। ध्यानजोग ऐ जे दिल्ली थमां बिहार दे माहोबा बक्खी जा'रदी इक बस च ग्रेटर नोएडा च यमुना एक्सप्रेस-वे पर अगग लग्गी गेई जिस करी 9वें लोकें दी मौत होई गेई।

<><><><><><>

Jitendra-Kaladi

केन्द्री मंत्री डाक्टर जीतेन्द्र सिंह होरें ऐलान कीता ऐ जे जम्मू-कश्मीर दे उधमपुर दी पारंपरिक जीआई टैग हासल कलाड़ी, मुकामी ते आलमी सतह दे बजारें लेई इक बड्डे कारोबारी मुकाम तगर पुज्जी गेई ऐ। डाक्टर सिंह होरें गलाया जे रामनगर ते उधमपुर दी प्रमाणिक कलाड़ी गी बशेश डोगरा व्यंजन दे तौर उप्पर बडे मानै कन्नै बड्डे मंचें पर पेश कीता जा करदा ऐ। उं'नें दस्सेआ जे कर्नाटक च सीएफटीआरआई मैसूरू दी सांझ-भ्याली कन्नै कीती गेदी साईंसी पैहलकदमिएं राहें कलाड़ी गी फ्रिज च रक्खने पर खराब होने शा पैहले दी अवधि गी कामयाबी

दे कन्नै होर च'उं हप्तें धोड़ी बधाई दिती गेआ ऐ ते खास गल्ल एहू ऐ जे बधाई गेदी इस अवधि दरान बी कलाड़ी दे पारंपरिक सुआद च कोई कमी नेई औगा।

<><><><><><>

Samba Rainfall

सांबा जिले च अज्ज बडुलै चानचक्क बरी दी बरखा ते अंधी-झक्खड़ ने मौसम च बडुा बदलाव आहन्नी दिता ऐ। उ'आं पकने दी कगार उप्पर पुज्जी गेदी मुंजी दी फसल, तेज ब्हाउ करी पूरी चाल्ली तबाहू होई गेई। बन्ने आहले ग्रांS रामगढ, नन्दपुर, राजपुरा ते एहदे कन्नै लगदे होरनें ग्राएं च अंधी-झक्खड़ करी मते सारे खेत्तरे च मुंजी दी फसल गी बड़ा मता नुक्सान पुज्जा ऐ। नुक्सान दा आकलन अजे कीता जाना ऐ।

<><><><><><>

JK-PMFBY

सरकारै अज्ज विधानसभा च जानकारी दिती ऐ जे प्रधानमंत्री फसल बीमा योजना ते मौसम आधारित फसल बीमा योजनास्कीम दी अमलावरी जम्मू-कश्मीर दे सारे 20 जिलें च कीती जा'रदी ऐ। 12 लक्ख 89 ज्हार करसान एहदे तैह्त्त आहन्ने गए न ते अजें तगर 221 करोड़ 71 लक्ख रपे बंडे गए न। आकाशवाणी जम्मू संवाददाता नै विधानसभा च रक्खे गेदे आंकड़े मूजब राई-बाई मंत्री होरें आखेआ जे एहू स्कीमां हर योग्य करसान परौआर लेई न। सरकारै आखेआ जे तकरीबन 13 लक्ख 98 ज्हार शा एहदे तैह्त्त योग्य न।

<><><><><><>

ST-II Certificates

सरकारै विधानसभा च जानकारी दितती ऐ जे 5 लक्ख 73 ज्हार अनुसूचित जनजाति सरबन्धी प्रमाण पत्र योग्य लाभार्थीएं गी बंडे गए न। आकाशवाणी जम्मू संवाददाता दी रिपोर्ट मूजब अज्ज विधानसभा च जानकारी दिती गेई जे 20 जिलें च कुल 5 लक्ख 73 ज्हार 667 प्रमाण पत्र बंडे गए न। आंकड़े मूजब 5 लक्ख 4 ज्हार 7 प्रमाण पत्र जम्मू खित्ते च बंडे गए जिसले कि 69 ज्हार 660 प्रमाण पत्र कश्मीर खित्ते च बंडे गए।

<><><><><><>

Car Policy

ट्रांसपोर्ट मंत्री सतीश शर्मा होरें अज्ज विधानसभा गी एह जानकारी दित्ती ऐ जे नमें सिरेया तैयार कार पालिसी पर एल्लै सरकार संजीदगी कन्नै गौर करा करदी ऐ ते एहदे तैहत 'इक गड्डी-इक अधिकारी' दे सिद्धांत गी पेश करने दी तजवीज़ कीती गेदी ऐ। मंत्री होर विधायक रणबीर सिंह पठानिया हुं'दे आसेआ पुट्टे गेदे सोआल दा परता देआ करदे हे। इस प्रस्तावित नीति च सरकार आसेआ जरूरी समझी जाने आहली ऐसी किश टकोहदी रियायतां बी दित्तिआं जाडन जिं'दे च सुरक्षा सरबन्धी जरूरतें, फील्ड ड्यूटी, बाद्दू कार्यभार ते बक्ख-बक्ख मैह्कमें ते संगठन दित्तिआं कम्मकाजी जरूरतां बी शामिल न।

<><><><><><>

Startup Idea

जम्मू-कश्मीर च उद्यम-कारखानादारी दे विकास सरबन्धी संगठन - जेके-ईडीआई आसेआ अज्ज पुंछ दे श्री कृष्ण चंद्र सरकारी डिग्री काॅलेज च अज्ज स्टार्ट-अप आईडिया चैलेंज दे दुए चरण दा आयोजन कीता गेआ। एहदे मकसद विद्यार्थिं अंदर नमियां काहडां कडुने दी प्रवृत्ति ते उद्यम-कारखानादारी गी बढावा देना ह। इस कार्यक्रम ने बक्ख-बक्ख कालेजें ते शिक्षा संस्थानें दे विद्यार्थिं गी इक सांझे मंच उप्पर औने ते अपने स्टार्ट-अप सरबन्धी बचार पेश करना दा बड़ा बधिया मौका दित्ता। इस मौके पर प्रतिभागिं, रचनात्मकता, नमिं काहडें ते टिकाउ कारोबारी युनिट विकसित करने दी समर्थ आहले अपने बचारें दा बड़े बधिया ढंगै कन्नै प्रदर्शन कीता। कालेज दे प्रिंसिपल जसबीर सिंह होरें इस कार्यक्रम दा उद्घाटन कीता।

<><><><><><>